

'Mereka tidak dapat terima kekalahan'
Malaysiakini.com
July 23, 2010

Ketua Umno Sungai Petani, Ali Yahaya berkata beliau tidak mempunyai sebarang masalah dengan ahli di peringkat umbi di bahagian berkenaan.

Sebaliknya, beliau mendakwa, masalah tersebut ditimbulkan oleh pihak dalam Umno itu yang kalah dalam pemilihan kepimpinan peringkat bahagian pada 2008.

"Mereka yang kalah itu tidak dapat menerima kekalahan, mungkin kerana sudah terlalu lama duduk di atas," katanya ketika dihubungi Malaysiakini hari ini.

Dalam pemilihan tersebut, Ali yang tidak memegang sebarang jawatan di peringkat bahagian itu, berjaya merebut jawatan ketua bahagian daripada penyandangannya, Abu Bakar Ahmad.

Keputusan tersebut dikatakan tidak disenangi oleh beberapa pihak di peringkat akar umbi di bahagian itu.

Persidangan perwakilan bahagian itu pada 11 Julai lalu, kecoh apabila sebahagian besar perwakilan tidak membenarkan Ali berucap di majlis perasmian.

Kekecohan hampir 45 minit itu bermula kira-kira pukul 9.30 pagi selepas bacaan doa dan nyanyian Negaraku, apabila seorang anggota jawatankuasa bahagian, Mohd Yusuf Lazim bangun menyuarakan perasaan tidak puas hati terhadap Ali dan mahu beliau melepaskan jawatan.

Keadaan bertambah kecoh apabila lebih ramai perwakilan bangun termasuk anggota Wanita meminta Ali berundur sehingga menyebabkan pertikaman lidah antara perwakilan dengan penyokong Ali.

Menurut Mohd Yusof, Ali tidak layak menjadi ketua bahagian kerana menimbulkan pelbagai kesulitan kepada kepimpinan parti termasuk tindakannya tidak disenangi banyak pihak dan agensi kerajaan.

Malah naib ketua bahagian, Datuk Firdaus Zakaria dan ketua Puteri Sungai Petani, Shahanim Mohd Yusof yang berada di atas pentas turut turun menyertai perwakilan meminta Ali berundur.

Bekas setiausaha Umno bahagian Sungai Petani, Mohd Akhir Shafie mendakwa lebih 60 peratus daripada perwakilan yang hadir mahu Ali melepaskan jawatan.

Ekoran itu, mesyuarat Majlis Tertinggi Umno memutuskan supaya pengurusan bahagian Sungai Petani diambil alih badan perhubungan negeri.

Mengulas lanjut, Ali berkata mereka sepatutnya menerima keputusan pemilihan tersebut.

"Peraturan kata dah menang... menanglah. Apa pun tunggulah pemilihan yang akan datang.

"Saya juga tiada masalah dengan ahli-ahli di peringkat umbi," katanya.

Ali juga berkata, pihaknya juga telah menengguhkan cadangan untuk mengadakan majlis perpaduan antara seluruh kepimpinan dan ahli di bahagian tersebut.

"Kami menengguhkan majlis tersebut sebagai menghormati keputusan Majlis Tertinggi Umno baru-baru ini.

"Kami sedang menunggu arahan terkini daripada badan perhubungan Umno negeri. Kami tak mahu timbulkan kontroversi," katanya.

Ali juga menafikan dakwaan pihak-pihak tertentu yang majlis tersebut dirancang bertujuan untuk

menjelaskan berhubung kekecohan yang berlaku di mesyuarat perwakilan bahagian itu pada 11 Julai lalu.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/138186>